



**Z**em das. g. mach zu gleycher weys wie formen das. c. beschriben ist / allein vor der lini. g. h. zeuch den breiten strich des bustaben von der rundirung gerad vbersich bis an die lini. e. f. vnd schweyff in oben auß wie du vor gelet bist / aber vnden laß die eck vnd winckel beleyben. Oder mach das. g. also in die forgetenlte fierung / reys ein Diameter. c. b. vnd setz den cirkel mit dem ein fues in den puncten. i. vnd mit dem anderen reys ein cirfeldrum auß dem. e. bis mitten auß. c. d. da hin setz ein. l. also reys auch von dem. e. vbersich an die lini. a. b. bis an die aufrechten. g. da hin setz ein. z. Darnach setz auß die lini. g. h. ein puncten in eyn zehenteyl von der leng. g. h. vñ zeuch mit der hand. l. m. rund zusamen. Darnach zeuch auß dem. z. vbersich ein ortlini so lang des bustabē strich breyt ist / vnd neyg die lini mitten zwischen die cirfellini vnd der aufrechten. g. h. von diesem ende zeuch mit der hand ein runde lini bis an die lini. a. b. da die cirfellini an rürt. Darnach schneyd. g. h. vnden mit einem puncten. n. ein dritteyl ab / also hoch zeuch den breyten aufrechten zug von dem. m. vbersich / vnd mach die ausschweyffung oben noch so breyt als der zug ist. Darnach setz den cirkel mit dem ein fues so weyt ob dem. i. als breyt des bustaben breyter zug ist / in den Diametr. c. b. vnd reys mit der weyten. e. i. mit dem anderen fues ein cirfellini die die eusser cirfellini oben rürt / vnd ende vnden ob dem. l. Darnach zeuch die lini von der hand zu dem breyten aufrechten zug bey der höhe des. m. vnd zeuch auch oben von der hand die kleiner breyten des bustaben zugs. Wie dz hernach ist außgerissen.



**Z**em das. h. mach in seiner fierung von zweyen der grösserenn breyten aufrechten zügen so hoch die fierung ist / also das ire eussere ausschweyffung die vier eck der fierung. a. c. vnd. b. d. anrüren / vñ wie du die breyten aufrechten züg der bustaben oben vñ vnden außbeden seyten außschweyffen solt / bist du foren berichte / dan ein yetlicher bustab ist in einem yetlichen breyten aufrechten strich oben vnd vnden in seiner ausschweyffung / drey mal so breyt als in der mitt / wo anderst kein dünner strich daran felt / so das gethan ist als dan mach den dünnen zwerch zug zwischen den aufrechten mitten auß der lini. e. f. Wi. das vnden ist außgerissen.